

Nuwe Lied Bediening

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: kontak@nuwelied.info
Webwerf: <http://www.nuwelied.info>

AANBID JY 'N GOUE KALF ?

[Hersien Maart 2012]

Aanbid jy 'n dalk goue kalf sonder dat jy daarvan bewus is? Waarskynlik sal jy, net soos toe ek hiermee gekonfronteer was, vinnig wees om 'Nee' te antwoord. En tog vereis hierdie vraag van ons elkeen om eers ernstige selfondersoek te doen alvorens ons antwoord. Dit is nodig om in die lig van die goue kalf wat Aäron vir Israel gebou het, en die rede hoekom hy dit gedoen het, eers te besin voor ons antwoord. Begaan ons nie dikwels die dieselfde fout as Aäron en die volk Israel nie? Bou ons nie ook dikwels 'n goue kalf-beeld en aanbid dit in die oortuiging dat dit die ware God is wat ons dien nie?

Ons lees in Ex. 32:1 tot 5 die volgende:

Toe die volk sien dat Moses vertoef om van die berg af te kom, het die volk rondom Aäron versamel en vir hom gesê: Kom, maak vir ons gode wat voor ons uit trek; want hierdie Moses, die man wat ons uit Egipteland laat optrek het, ons weet nie wat van hom geword het nie. En Aäron sê vir hulle: Ruk die goue ringe af wat aan die ore van julle vroue, julle seuns en julle dogters is, en bring dit vir my. Toe het die hele volk die goue ringe afgeruk wat aan hulle ore was, en dit na Aäron gebring. En hy het dit uit hulle hand geneem en dit met die beitel bewerk en daar 'n gegote kalf van gemaak. Daarop sê hulle: Dit is jou gode, o Israel, wat jou uit Egipteland laat optrek het. Toe Aäron dit sien, het hy daarvoor 'n altaar gebou. En Aäron het uitgeroep en gesê: Môre is daar fees tot eer van YHWH.

Dit is feitlik ondenkbaar dat Israel wat pas deur die kragtige hand van YHWH uit Egipte gelei was, wat droogvoets deur die rooisee getrek het, wat die vernietiging van die magtige Egiptiese weermag aanskou het, wat die bonatuurlike voorsiening van water en manna evaar het, wat die Sinai ervaring beleef het, en wat dag en nag die Shekinag (heerlikheid) van YHWH in die wolk- en vuurkolom ervaar het, vir Aäron gevra het om vir hulle gode te maak wat voor hulle uittrek!! (Ex. 32:1). En tog is dit wat gebeur het!!

Aäron het gehoor gegee aan Israel se versoek. Hy het vir Israel 'n kalfgod gemaak, asook 'n altaar voor die beeld gebou en gesê: *Môre is daar fees tot*

eer van YHVH. So het hulle dan die volgende dag brandoffers en drankoffers geoffer en feesgevier.

Het Israel werklik geglo dat hierdie kalfgod die ware Almagtige Skeppergod is? Het Israel vir YHVH totaal verwerp deur 'n kalfgod te bou en te aanbid? Die antwoord op beide hierdie vrae is 'Nee'. Israel het bloot geglo dat hierdie kalfgod YHVH verteenwoordig. Hulle het nie werklik geglo dat die kalfgod YHVH is nie, maar dat hulle YHVH deur middel van die kalfgod kon aanbid. Hierdie afgod was vir Israel 'n fisiese voorstelling (afbeelding) van die geestelike gesag en mag van YHVH. Hulle het geglo dat die karakter en hoedanighede van YHVH deur hierdie kalfgod verteenwoordig word. Israel was oortuig dat hierdie kalfgod YHVH hulle Verlosser van die Egiptiese slawejuk verteenwoordig.

Hoewel Israel se bedoelings opreg was, het 'n kalfgod egter die ware God van Abraham, Isak en Jakob vervang, en die ware 'beeld' – die karakter en hoedanighede – van YHVH was vervang met 'n goue beeld wat soos 'n kalf gelyk het en die sintuie bevredig het. Israel het besluit hoe hulle YHVH sal aanbid en dien. Hulle het 'n mensgemaakte verhouding met YHVH vir hulself uitgewerk. Mensgemaakte leerstellings het die onderrig van YHVH, wat Hy by Sinai aan hulle gegee het, vervang. Hierdie kalfgod sou Israel vergesel op sy tog na die Bellofde Land!

Wat was die oorsaak van hierdie misleiding? Die mens het weens sy sondige aard die geneigdheid om 'n god te wil dien wat volgens eie maatstaf en standaard is. Ons almal is geneig om vir ons 'n kalfgod te wil maak. Die rede is dat so 'n kalfgod gemanipuleer en beheer kan word en nie werklike aanspreeklikheid van ons vereis nie.

Dit is baie makliker om 'n kalfgod te dien as YHVH die Almagtige, want ek kan 'n goue kalf dien soos ek wil, wanneer ek wil en indien ek wil. Ek kan kies watter dag 'n rusdag is, my eie feesdae bepaal en self kies wat rein en onrein is (reg en verkeerd). 'n Kalfgod laat my toe om myself te verryk en dit 'n bediening te noem. Laastens, en die belangrikste, is dat 'n goue kalf my altyd goed laat lyk en goed laat voel, want die fokus is op die eie-ek (selfisme, materialisme).

Die vraag wat ons elkeen moet vra is: Het ek dalk 'n goue kalf vir myself opgerig wat die plek van YHVH ingeneem het? Met goeie bedoelings kan ek hierdie kalfgod aanbid en ook 'n altaar bou en 'n feesdag tot sy eer uitroep, terwyl ek egter met afgodery besig is. Soos Israel is ek op 'n kragdadige wyse deur die kosbare bloed van Yeshua bevry van die slawejuk van sonde. Ek het ook die wonderwerkende krag van YHVH in my lewe ondervind, en ek het ook 'n Sinai ontmoeting gehad toe ek met die Ruach HaKodesh (Heilige Gees) gevul is en YHVH Sy wet op die tafels van my hart geskryf het. YHVH het vir my die pad van geregtigheid in sy Torah (Sy onderrig en instruksies) uitgestippel en die dag toe ek wedergebore is, het ek ook soos Israel gesê:

Alles wat YHVH gespreek het sal ek doen (Ex. 19:8; Ex. 24:3 en 7). Getuig my lewe hiervan of het ek soos Israel hiervan afgewyk?

En hulle het gou van die weg afgewyk wat Ek hulle beveel het. Hulle het vir hulle 'n gegote kalf gemaak en daarvoor neergebuig en daaraan geoffer en gesê: Dit is jou gode, o Israel, wat jou uit Egipteland laat optrek het.
Ex. 32:8

Volg ek my Redder se voorskrifte soos vervat in Torah of het ek gekies om soos Israel vir my 'n kalfgod te maak waar ek die reëls en standarde opstel?

Wil jy weet of jy 'n kalfgod in jou lewe dien? Toets jouself aan die hand van die tien gebooie. Onderhou jy al tien? Is dit jou begeerte om aan al tien gehoorsaam te wees al faal jy soms? Glo jy dat geloof in Yeshua as Messias jou nie onthef van gehoorsaamheid aan YHVH se wet (Sy Torah) nie? Indien jy **nie** met 'n besliste "Ja" op hierdie vrae kan antwoord nie, aanbid jy 'n goue kalf!! Dan dien jy nie die God wat jou uit Egipte (sonde) bevry het nie, maar 'n goue kalf wat jy vir jouself opgerig het.

Goue Kalwers

Die kalfgod leef steeds! Ons maak 'n goue kalf elke keer wat ons enige van YHVH se karaktertrekke en hoedanighede ontken of dit vorm tot ons eie beeld wat ons van die Almagtige het. YHVH se karakter en hoedanighede word in die tien gebooie opgesom en in die Torah uiteengesit. Om een van sy karaktertrekke of hoedanighede te ontken (dit te minag) of dit te wysig, is om 'n goue kalf te maak. Dan dien ons nie meer die ware Elohiem nie, maar 'n afgod!!

Die ewige lewe is om YHVH as die enige waaragtige Elohiem, en Yeshua as Messias, te ken (Joh. 17:3). In die woorde van Torah word YHVH Yeshua aan ons geopenbaar. Soos Israel word ons deur geloof in die Geslagde Lam gered, maar deur Torah leer ons hoe om as gergeverdigdes te lewe. Deur die woorde van Torah leer ek YHVH Yeshua intiem ken.

Die hele Skrif is deur Elohiem ingegee en is nuttig tot lering, tot weerlegging, tot teregwyding, tot onderwysing in die geregtigheid, sodat die mens van Elohiem volkome kan wees, vir elke goeie werk volkome toegerus. 2 Tim. 3:16 en 17.

Goeie bedoelings is ook nie 'n plaasvervanger vir gehoorsaamheid nie. Israel se goeie bedoelings was nie regverdiging vir die goue kalf nie. Indien goeie bedoelings vir YHVH aanvaarbaar was, sou Hy dit vir ons gesê het. 'n Goue kalf getuig van hardnekkigheid wat rebellie teen YHVH se gesag is. Kain het ook probeer om YHVH op 'n mensgemaakte wyse te dien en te aanbid en hy het 'n duur prys daarvoor betaal (Gen. 4:1 tot 12). So ook het Nadab en Abihu *vreemde vuur voor die aangesig van YHVH gebring, wat Hy hulle nie beveel het nie* en hulle het gesterwe (Lev. 10:1 en 2). Saul was sy

koningskap kwyt omrede hy ongehoorsaam was aan YHVH se opdrag (1 Sam. 15:19 tot 23). Die woorde van Sameul spreek steeds tot ons vandag:

Het YHVH behae in brandoffers en slagoffers soos in gehoorsaamheid aan die stem van die YHVH? Kyk, om gehoorsaam te wees is beter as slagoffer, om te luister beter as die vet van ramme. Want wederstrewigheid is 'n sonde van waarsêery, en eiesinnigheid is afgodery en beelddiens. 1 Sam. 15:22 en 23).

Ongehoorsaamheid aan die Woorde (die wet, die Torah) van YHVH is afgodery en beelddiens – dit is om 'n kalfgod op te rig en te aanbid. Dit is om jou eie geregtigheid op te rig (Rom. 10:2 en 3) en nie die geregtigheid van YHVH te soek nie (Matt. 6:33).

Let daarop dat Ex. 32:1 en 4 verwys na gode: *Dit is jou **gode**, o Israel, wat jou uit Egipteland laat optrek het.* Deur die eeue het gelowiges baie goue kalwers (afgode) opgerig. Daar is die kalfgod van kersfees; die kalfgod van Easter; die kalfgod van Sondagaanbidding; die kalfgod van kinderdoop; die kalfgod van eet wat jy wil en vele meer kalfgode. Alles mensgemaakte leerstellings en gebruike waarmee YHVH vereer wil word. Baie sal hiermee saamstem, maar steeds voortgaan met die aanbidding van 'n goue kalf. Onkunde en tradisie, met die gepaardgaande vrees vir verwerping is die binding wat maak dat mense voor 'n kalfgod buig. Is jy deel van hierdie aanbidding? Luister weer na die woorde van Elia:

En Elía het nader gekom na die hele volk en gesê: Hoe lank hink julle op twee gedagtes? As YHVH Elohiem is, volg Hom na; en as Baäl dit is, volg hom na! Maar die volk het hom niks geantwoord nie. 1 Kon. 18:21.

Hunker jy nog op twee gedagtes? Dink jy werklik jy kan YHVH en Baäl dien? Dink jy YHVH sal daarmee tevrede wees en jou goeie bedoelings raaksien en jou vergewe? Nee, YHVH duld geen ander gode in ons lewens nie:

Jy mag geen ander gode voor my aangesig hê nie. Jy mag vir jou geen gesnede beeld of enige gelykenis maak van wat bo in die hemel is, of van wat onder op die aarde is, of van wat in die waters onder die aarde is nie. Jy mag jou voor hulle nie neerbuig en hulle nie dien nie; want Ek, YHVH jou Elohiem, is 'n jaloerse Elohiem wat die misdaad van die vaders besoek aan die kinders, aan die derde en aan die vierde geslag van die wat My haat; en Ek bewys barmhartigheid aan duisende van die wat My liefhet en my gebooue onderhou. Ex. 20:3 tot 6

Daarom spreek YHVH deur Josua ook tot ons vandag hierdie woorde:

Hierdie wetboek mag nie uit jou mond wyk nie; maar bepeins dit dag en nag, sodat jy nougeset kan handel volgens alles wat daarin geskrywe staan; want dan sal jy in jou weë voorspoedig wees, en dan sal jy met goeie gevolg handel. Jos. 1:8

As ons YHVH waarlik liefhet, sal ons Sy Torah (onderrig en instruksies) nougeset navolg (Joh. 14:15). Wanneer ons Sy Woord bewaar, naamlik dit hoor en toepas in ons lewe, dan beantwoord ons Sy liefde vir ons (1 Joh. 2:5). Dan sal ons seker maak dat daar geen goue kalf in ons lewe is nie. Dan sal ons terugkeer na ware aanbidding en gehoorsaamheid en sal ons seker maak dat ons nie net uit "Egipte" is nie, maar seker maak dat "Egipte" uit ons is.

Is jy bereid om die kalfgod(e) in jou lewe te vernietig en die Vader in gees en waarheid te aanbid (Joh. 4:23)? YHVH is gees en die wat Hom aanbid, moet in gees en waarheid aanbid (Joh. 4:24). Yeshua is die vleesgeworde Waarheid van YHVH en hierdie Waarheid kan nie deur enige mensgemaakte 'kalfteologie' vervang word nie!

Ons moet leef as 'n uitverkore geslag, 'n koninklike priesterdom, 'n afgesonderde (heilige; *set-apart*) volk wat YHVH se eiendom is en wat die deugde verkondig van Hom wat ons uit die duisternis bevry het om in Sy wonderbare lig te lewe (1 Pet. 2:9). Aanbidding van 'n goue kalf van mensleerstellings is duisternis!! Vernietig die kalfgode en leef in Yeshua se wonderbare lig, want Hy is die ware Lig van YHVH.

Eie geregtigheid is die grootste en mees algemene van al die kalfgode. Ons mag wel ywer vir YHVH ons Vader hê, maar sonder die kennis van YHVH se geregtigheid sal ons verlore gaan. Soek YHVH se koninkryk en **SY GEREJTIGHEID!! Onderwerp jou aan YHVH se geregtigheid.**

Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).

Shalom
Johan

E-pos: kontak@nuwelielied.info
Webwerf: <http://www.nuwelielied.info>

Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.